

**BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO RADA I SOCIJALNE POLITIKE**

Prednacr

**Z A K O N
O ORGANIZACIJI PENZIJSKOG I INVALIDSKOG OSIGURANJA
FEDERACIJE BOSNE I HERCEGOVINE**

Sarajevo, novembar 2015. godine

Z A K O N
O ORGANIZACIJI PENZIJSKOG I INVALIDSKOG OSIGURANJA
FEDERACIJE BOSNE I HERCEGOVINE

POGLAVLJE I. OSNOVNE ODREDBE

Član 1.

Ovim Zakonom uređuju se organizacija Federalnog zavoda za penzijsko i invalidsko osiguranja (u daljnjem tekstu: Federalni zavod), organi upravljanja i njihove nadležnosti, rukovođenje penzijskim i invalidskim osiguranjem, osnove organizacije jedinstvene administrativne službe i druga pitanja značajna za organizaciju penzijskog i invalidskog osiguranja.

Član 2.

- (1) Federalni zavod je javna ustanova koja će djelovati u skladu sa propisima koji regulišu rad ustanova, ako ovim Zakonom nije drugačije određeno.
- (2) Federalni zavod je pravna lice s pravima, obavezama i odgovornošću utvrđenim ovim Zakonom, drugim zakonima i Statutom Federalnog zavoda (u daljnjem tekstu: Statut).
- (3) Sjedište Federalnog zavoda je u Mostaru.
- (4) Rad Federalnog zavoda je javan. Federalni zavod, putem nadležnog ministarstva, o svom radu, najmanje jedanput godišnje izvještava Vladu Federacije Bosne i Hercegovine (u daljnjem tekstu: Vlada) i Parlament Federacije Bosne i Hercegovine (u daljnjem tekstu: Parlament).

POGLAVLJE II. ORGANIZACIJA I ORGANI FEDERALNOG ZAVODA

Član 3.

- (1) Federalni zavod obavlja sve poslove iz penzijskog i invalidskog osiguranja u skladu sa ovim Zakonom, Zakonom o penzijskom i invalidskom osiguranju, drugim zakonima i svome Statutu.
- (2) Federalni zavod:
 - a) osigurava zakonito, racionalno i efikasno ostvarivanje prava iz penzijskog i invalidskog osiguranja,
 - b) pruža stručnu pomoć osiguranicima prilikom ostvarivanja prava,
 - c) osigurava provođenje međunarodnih ugovora o socijalnom osiguranju,
 - d) vodi odgovarajuće evidencije,
 - e) posluje sredstvima i imovinom Federalnog zavoda,
 - f) provodi utvrđenu politiku iz penzijskog osiguranja,

- g) obavlja i druge poslove u vezi sa provođenjem i ostvarivanjem prava iz penzijskog i invalidskog osiguranja, a u skladu sa Zakonom, Statutom i drugim općim aktima.

Član 4.

Federalni zavod ima Statut koji donosi Upravni odbor Federalnog zavoda, a istim se uređuje:

- a) organizacija Federalnog zavoda,
- b) prava, obaveze i odgovornost organa upravljanja i rukovođenja i to: djelokrug rada, ovlaštenja, uvjeti postavljenja direktora i zamjenika direktora Federalnog zavoda, kao i uvjeti i postupak postavljenja rukovodioca i zamjenika rukovodioca Središnje službe i rukovodioca administrativnih službi,
- c) druga pitanja od značaja za rad Federalnog zavoda.

Član 5.

- (1) Organi Federalnog zavoda su Upravni odbor, Nadzorni odbor i direktor.
- (2) Predsjedavajući Upravnog i Nadzornog odbora, te direktor i zamjenik direktora ne mogu biti iz reda istog konstitutivnog naroda.

Član 6.

- (1) Upravni odbor Federalnog zavoda (u daljem tekstu: Upravni odbor) je organ upravljanja i sastoji se od predsjedavajućeg i šest članova.
- (2) Upravni odbor, na prijedlog Federalnog ministarstva rada i socijalne politike (u daljem tekstu: Ministarstvo), imenuje i razrješava Vlada i to:
 - a) dva člana na prijedlog Ministarstva iz reda zaposlenika Ministarstva,
 - b) jednog člana na prijedlog Federalnog ministarstva finansija iz reda zaposlenika,
 - c) jednog člana na prijedlog na prijedlog Federalnog zavoda iz reda zaposlenika zavoda,
 - d) jednog člana na prijedlog reprezentativnog većinskog udruženja penzionera u Federaciji Bosne i Hercegovine,
 - e) jednog člana na prijedlog reprezentativnog većinskog sindikata u Federaciji Bosne i Hercegovine,
 - f) jednog člana na prijedlog reprezentativnog većinskog udruženja poslodavaca u Federaciji Bosne i Hercegovine.
- (3) Za predsjedavajućeg i članove Upravnog odbora imenuju se lica koje imaju visoku stručnu spremu, najmanje VII stepena, odnosno visoko obrazovanje prvog (najmanje 240 ECTS bodova), drugog ili trećeg ciklusa Bolonjskog sistema studiranja.

- (4) Detaljni uvjeti koje mora da ispunjava lice koja se imenuje u Upravni odbor, kao i uvjeti pod kojima može biti razriješeno prije isteka mandata, propisuju se ovim Zakonom i Statutom.
- (5) Mandat članova Upravnog odbora traje četiri godine. Vlada može razriješiti predsjedavajućeg ili člana Upravnog odbora i prije isteka mandata.
- (6) U slučaju prestanka mandata članu Upravnog obora iz bilo kog razloga, prije vremena na koje je imenovan, imenuje se novi član čiji mandat traje onoliko vremena koliko bi trajao mandat člana na čije mjesto se imenuje.

Član 7.

- (1) Upravni odbor obavlja sljedeće poslove:
 - a) donosi Statut Federalnog zavoda i druge opće akte,
 - b) donosi finansijski plan, usvaja godišnji obračun i izvještaj o radu Federalnog zavoda,
 - c) stara se o finansijskoj stabilnosti Federalnog zavoda,
 - d) uređuje organizaciju Središnje službe i drugih unutrašnjih organizacionih dijelova, sistematizaciju poslova i broj izvršilaca poslova,
 - e) ima odgovornost da održi fiskalni balans i ne dopusti stvaranje obaveza prema korisnicima bilo novčanih ili u vidu vrijednosnih papira koje ne može pokriti iz prihoda,
 - g) imenuje komisije i druga radna tijela Upravnog odbora,
 - h) utvrđuje osnovice za obračun i uplatu doprinosa koje nisu propisane Zakonom o doprinosima,
 - i) vrši i druge poslove u skladu sa Zakonom, Statutom i drugim općim aktima Federalnog zavoda.
- (2) Način rada, kao i druga pitanja koja se odnose na rad Upravnog odbora, uređuju se Statutom.

Član 8.

- (1) Upravni odbor donosi odluke nadpolovičnom većinom glasova imenovanih članova Upravnog odbora.
- (2) Statutom se detaljnije uređuje rad Upravnog odbora.

Član 9.

- (1) Nadzorni odbor Federalnog zavoda (u daljem tekstu: Nadzorni odbor) je organ nadzora i sastoji se od predsjedavajućeg i dva člana.
- (2) Nadzorni odbor, na prijedlog Ministarstva, imenuje i razrješava Vlada i to:
 - a) jednog člana na prijedlog Ministarstva iz reda zaposlenika Ministarstva,

- b) jednog člana na prijedlog Federalnog ministarstva finansija iz reda zaposlenika,
 - c) jednog člana na prijedlog reprezentativnog većinskog udruženja penzionera u Federaciji Bosne i Hercegovine,
- (3) Za predsjedavajućeg i članove Nadzornog odbora imenuju se lica koja imaju visoku stručnu spremu, najmanje VII stepena, odnosno visoko obrazovanje prvog (najmanje 240 ECTS bodova), drugog ili trećeg ciklusa Bolonjskog sistema studiranja.
 - (4) Detaljni uvjeti koje mora da ispunjava lice koja se imenuje u Nadzorni odbor, kao i uvjeti pod kojima može biti razriješeno prije isteka mandata, propisuju se ovim Zakonom i Statutom.
 - (5) Nadzorni odbor se imenuje na mandat od četiri godine.
 - (6) Statutom se detaljnije uređuje rad Nadzornog odbora.

Član 10.

- (1) Nadzorni odbor vrši sljedeće poslove:
 - a) vrši uvid u godišnji obračun i godisnji finansijski obračun Federalnog zavoda;
 - b) vrši uvid i provjerava urednost i zakonitost vođenja poslovnih knjiga,
 - c) vodi računa o namjenskom trošenju finansijskih sredstava Federalnog zavoda;
 - d) o rezultatima nadzora izvještava Ministarstvo i Vladu;
 - e) vrši i druge poslove u skladu sa Zakonom i Statutom.
- (2) Ukoliko Nadzorni odbor u obavljanju poslova iz stava 1. ovog člana, uoči nepravilnosti u radu Federalnog zavoda, obavezan je upozoriti nadležne organe Federalnog zavoda i zahtijevati njihovo otklanjanje, te o istom izvijestiti Ministarstvo i Vladu.

Član 11.

- (1) Direktor Federalnog zavoda je organ rukovođenja.
- (2) Direktora Federalnog zavoda imenuje Vlada, nakon provedenog javnog konkursa.
- (3) Direktor Federalnog zavoda mora biti lice koja ima visoku stručnu spremu, najmanje VII stepena, odnosno visoko obrazovanje prvog (najmanje 240 ECTS bodova), drugog ili trećeg ciklusa Bolonjskog sistema studiranja.
- (4) Detaljni uvjeti koje mora da ispunjava lice koja se imenuje za direktora, kao i uvjeti pod kojima može biti razriješeno prije isteka mandata, propisuju se se ovim Zakonom i Statutom.
- (5) Direktor Federalnog zavoda imenuje se na mandat od četiri godine, s tim da može biti razriješen, na prijedlog Vlade ili Ministarstva i prije isteka vremena na koje je imenovan.

- (6) Direktor ima zamjenika koji se imenuje i razrješava na isti način kao i direktor.

Član 12.

- (1) Direktor Federalnog zavoda obavlja sljedeće poslove:
- a) predstavlja i zastupa Federalni zavod i odgovoran je za zakonitost rada,
 - b) organizuje rad i poslovanje Federalnog zavoda,
 - c) rukovodi radom Federalnog zavoda,
 - d) izvršava odluke Upravnog odbora,
 - e) izvještava Parlament Federacije Bosne i Hercegovine, Vladu Federacije, Ministarstvo i Upravni odbor o radu Federalnog zavoda,
 - f) na zahtjev Ministarstva dostavlja tražene informacije, analize, procjene i druge materijale,
 - g) vrši i druge poslove u skladu sa Zakonom i Statutom Federalnog zavoda.
- (2) Zamjenik direktora obavlja sljedeće poslove:
- a) mijenja direktora u slučaju njegove odsutnosti,
 - b) po ovlaštenju direktora obavlja i druge poslove u skladu sa Zakonom i Statutom Federalnog zavoda.

Član 13.

- (1) Lica koja se imenuju u Upravni odbor i Nadzorni odbor, kao i direktor i zamjenik direktora, moraju biti lica sa stručnim znanjem i odgovarajućim iskustvom iz oblasti penzijskog i invalidskog osiguranja ili finansija i moraju imati najmanje 8 godina radnog iskustva na navedenim poslovima.
- (2) Član Upravnog odbora, Nadzornog odbora, direktor i zamjenik direktora ne može biti:
- a) lice koja je pravosnažno osuđivano za krivično djelo koje ga čini nedostojnim za obavljanje te funkcije, a naročito krivičnih dijela protiv privrede, poslovanja i sigurnosti pravnog prometa,
 - b) odgovorna lice u privrednom društvu nad kojim je pokrenut stečajni postupak,
 - c) lice koja ima poslovni odnos sa Federalnim zavodom, odnosno lice čije bi djelovanje moglo da dovede do sukoba interesa.

Član 14.

Član Upravnog odbora, Nadzornog odbora, direktor i zamjenik direktora razrješavaju se u sljedećim slučajevima:

- a) nastanka okolnosti iz člana 13. stavak 2.,

- b) ako ne postupaju po važećim Zakonskim propisima, Statutu i drugim općim aktima Federalnog zavoda,
- c) u slučaju neprovođenja politike Vlade i nepostupanja po uputama Ministarstva, odnosno Vlade,
- d) ako zanemaruju i nesavjesno obavljaju svoje dužnosti.

POGLAVLJE III. SREDIŠNJA I ADMINISTRATIVNE SLUŽBE

Član 15.

- (1) Federalni zavod je organiziran na način da ima jednu Središnju i administrativne službe.
- (2) U Središnjoj službi vrši se obavljanje pravnih, ekonomskih, administrativnih i drugih poslova Federalnog zavoda.
- (3) Administrativne službe su unutrašnje organizacione jedinice Federalnog zavoda, čiji broj, prema potrebama, utvrđuje Upravni odbor.
- (4) Organizacija poslova u Središnjoj i administrativnim službama, zasniva se na načelima: zakonitosti, efikasnosti i transparentnosti, a detaljnije će se urediti Statutom Federalnog zavoda i Pravilnikom o unutrašnjoj organizaciji i sistematizaciji radnih mjesta.
- (5) Središnja i administrativne službe sredstva za svoj rad osiguravaju iz prihoda Federalnog zavoda.
- (6) Središnjom i administrativnim službama rukovode rukovoditelji, koje imenuje Upravni odbor, a na usaglašeni prijedlog direktora i zamjenika direktora, u skladu sa važećim propisima iz oblasti radnog zakonodavstva.

Član 16.

U Središnjoj službi obavljaju se sljedeći poslovi:

- a) funkcionisanje i razvoj sistema,
- b) koordinacija i praćenje primjene Zakona, općih akata i međunarodnih ugovora o socijalnom osiguranju,
- c) izrada prijedloga Statuta i općih akata,
- d) raspoređivanje sredstava za penzijsko i invalidsko osiguranje,
- e) rješavanje u drugom stepenu pitanja u vezi prava i obaveza iz penzijskog i invalidskog osiguranja,
- f) rješavanje u drugom stepenu pitanja u vezi prava i obaveza iz penzijskog i invalidskog osiguranja primjenom međunarodnih ugovora o socijalnom osiguranju,
- g) i drugi poslovi u skladu sa Zakonom, Statutom i općim aktima Federalnog zavoda.

Član 17.

U administrativnim službama obavljaju se sljedeći poslovi:

- a) rješavanje u prvom stepenu pitanja u vezi prava i obaveza iz penzijskog i invalidskog osiguranja,
- b) rješavanje u prvom stupnju pitanja u vezi s pravima i obavezama iz penzijskog i invalidskog osiguranja primjenom međunarodnih ugovora o socijalnom osiguranju,
- c) obavljanje drugih poslova u skladu sa Statutom i općim aktima Federalnog zavoda.

POGLAVLJE IV. STATUT

Član 18.

- (1) Statut i druge opće akte priprema Federalni zavod.
- (2) Statutom se detaljnije uređuje:
 - a) djelokrug rada, ovlaštenja i odgovornosti direktora i zamjenika direktora Federalnog zavoda i Središnje službe, te rukovodioca administrativnih službi,
 - b) detaljni uvjeti za imenovanje direktora i zamjenika direktora Federalnog zavoda,
 - c) način zauzimanja stavova i odlučivanja,
 - d) javnost rada Federalnog zavoda,
 - e) osnove organizacije Središnje službe, administrativnih službi i njihove nadležnosti,
 - f) druga pitanja od značaja za provođenje penzijskog i invalidskog osiguranja i za rad Federalnog zavoda.
- (3) Saglasnost na Statut i na druga opća akta Federalnog zavoda daje Ministarstvo.
- (4) Statut i opća akta Federalnog zavoda objavljuju se u "Službenim novinama Federacije BiH".

POGLAVLJE V. NADZOR I KAZNE ODREDBE

Član 19.

- (1) Nadzor nad radom Federalnog zavoda vrši Ministarstvo i nadležna inspekcija, svako u okviru svoje nadležnosti.
- (2) U vršenju inspekcijuskog nadzora nadležni inspektor ili drugo ovlašteno lice, za utvrđene nepravilnosti poduzima mjere prema općim ovlaštenjima propisanim Zakonom kojim se uređuje odgovarajuća oblast inspekcija.

Član 20.

- (1) Novčanom kaznom od 2.000 KM do 10.000 KM kazniće se Federalni zavod ako:
 - a) postupa suprotno odredbama ovog Zakona,
 - b) ne osigura poštivanje načela javnosti rada,
 - c) ne organizira rad i organizaciju u skladu sa odredbama ovog Zakona,
 - d) ne uskladi svoje opće akte i organizaciju u roku iz člana 21. ovog Zakona,
 - e) ne provodi politiku Vlade i Parlamenta,
 - f) ne postupa po uputama Ministarstva.
- (2) Za prekršaj iz stava 1. ovog člana novčanom kaznom od 500 KM do 2.000 KM, kazniće se i odgovorno lice Federalnog zavoda.

POGLAVLJE VI. PRIJELAZNE I ZAVRŠNE ODREDBE

Član 21.

- (1) Federalni zavod će svoje opće akte i organizaciju uskladiti sa odredbama ovog Zakona u roku od 90 dana od dana stupanja na snagu ovog Zakona.
- (2) Do donošenja novih općih akata, primjenjivaće se akti koji su bili na snazi na dan stupanja na snagu ovog Zakona, ako nisu u suprotnosti sa ovim Zakonom.

Član 22.

- (1) Mandat predsjedavajućem i članovima Upravnog odbora, predsjedavajućem i članovima Nadzornog odbora, direktoru i zamjeniku direktora Federalnog zavoda i direktorima i zamjenicima direktora središnje i kantonalnih administrativnih službi, prestaje najdalje u roku od 120 dana od dana stupanja na snagu ovog Zakona.
- (2) Status direktora i zamjenika direktora Središnje administrativne službe, kao i direktora i zamjenika direktora kantonalnih administrativnih službi rješit će se u skladu sa važećim Zakonskim propisima i općim aktima Federalnog zavoda, a u roku iz stava 1. ovog člana.

Član 23.

Stupanjem na snagu ovog Zakona prestaje da važi Zakon o organizaciji penzijskog i invalidskog osiguranja ("Službene novine Federacije BiH", br. 49/00, 32/01 i 18/05).

Član 24.

Ovaj Zakon stupa na snagu osmog dana od dana objavljivanja u "Službenim novinama Federacije BiH".

O b r a z l o ž e n j e

Prednacrtu Zakona o organizaciji penzijskog i invalidskog osiguranja

I USTAVNI OSNOV

Ustavni osnov za donošenje ovog Zakona nalazi se u odredbama člana III. 2. e), člana III. 3. (3) i člana III. 4. j) Ustava Federacije Bosne i Hercegovine, prema kojima su federalna vlast i kantoni nadležni za oblast socijalne politike. Federalna vlast ima pravo utvrđivati politiku i donositi zakone koji se tiču ove nadležnosti, a kantoni su posebno nadležni za provođenje socijalne politike i uspostavu službi socijalne zaštite.

Prema odredbama člana IV A. 20. (1) d) Ustava Federacije Bosne i Hercegovine, Parlament Federacije Bosne i Hercegovine nadležan je za donošenje Zakona o obavljanju funkcija federalne vlasti.

U skladu sa članom 27. Poslovnika o radu Vlade Federacije Bosne i Hercegovine - Prečišćeni tekst - („Službene novine Federacije BiH“, br. 6/10, 37/10 i 62/10), Prednacrt Zakona o organizaciji penzijskog i invalidskog osiguranja, bit će dostavljen Federalnom ministarstvu finansija/finansija, Federalnom ministarstvu pravde i Uredu Vlade Federacije Bosne i Hercegovine za Zakonodavstvo i usklađenost sa propisima Europske unije, radi davanja mišljenja.

II NAČELA NA KOJIMA SE ZASNIVA ZAKON

Ovaj Zakon se zasniva na načelima zakonitosti, funkcionalnosti, ekonomičnosti, efikasnosti, javnosti i transparentnosti.

III RAZLOZI ZA DONOŠENJE ZAKONA

Strategijom reforme penzijskog sistema u Federaciji Bosne i Hercegovine koja je usvojena na Parlamentu Federacije Bosne i Hercegovine (na Predstavničkom domu 11. i 12. novembra 2013. godine, a na Domu naroda 06.02.2014. godine), predviđena je izrada, između ostalih, i novog Zakona o organizaciji penzijskog i invalidsko osiguranja.

Vlada Federacije Bosne i Hercegovine je u cilju realizacije navedene Strategije na sjednici održanoj 22.05.2015. godine, donijela Zaključak (V. broj: 632/2015 od 22.05.2015. godine), kojim je zadužila Federalno ministarstvo rada i socijalne politike da formira interresornu radnu grupu koja će, između ostalih, pripremiti tekst Zakona o organizaciji penzijskog i invalidsko osiguranja. Nakon čega je, Federalni ministar rada i socijalne politike Rješenjem (broj: 04-02/1-101/14 od 22.06.2015. godine), formirao interresornu radnu grupu, kojim je ista

zadužena da, u roku od 90 (devedeset) dana, između ostalih, sačini tekst Zakona o organizaciji penzijskog i invalidsko osiguranja.

Radna grupa je sačinila Prednacrt Zakona o organizaciji penzijskog i invalidskog osiguranja, te isti dostavila Federalnom ministarstvu rada i socijalne politike, na daljnje postupanje.

IV OBRAZLOŽENJE PREDLOŽENIH PRAVNIH RJEŠENJA

Članom 1. propisane su opće odredbe o organizaciji Federalnog zavoda.

Članom 2. propisano je da je Federalni zavod javna ustanova koja djeluje u skladu sa propisima koji regulišu rad ustanova, s pravima, obavezama i odgovornošću utvrđenim ovim Zakonom, drugim zakonima i Statutom Federalnog zavoda. Nadalje, utvrđeno je da je sjedište Federalnog zavoda u Mostaru, da je njegov rad javan, te je istim propisana obaveza Federalnom zavodu, da putem nadležnog ministarstva, o svom radu, najmanje jedanput godišnje izvještava Vladu Federacije Bosne i Hercegovine i Parlament Federacije Bosne i Hercegovine.

Članom 3. propisano je da Federalni zavod obavlja sve poslove iz penzijskog i invalidskog osiguranja u skladu sa ovim Zakonom, Zakonom o penzijskom i invalidskom osiguranju, drugim zakonima i svome Statutu. Također, utvrđeno je da Federalni zavod osigurava zakonito, racionalno i efikasno ostvarivanje prava iz penzijskog i invalidskog osiguranja, pruža stručnu pomoć osiguranicima prilikom ostvarivanja prava, osigurava provođenje međunarodnih ugovora o socijalnom osiguranju, vodi odgovarajuće evidencije, posluje sredstvima i imovinom Federalnog zavoda, provodi utvrđenu politiku iz penzijskog osiguranja, obavlja i druge poslove u vezi sa provođenjem i ostvarivanjem prava iz penzijskog i invalidskog osiguranja, a u skladu sa Zakonom, Statutom i drugim općim aktima.

Članom 4. propisano je da Federalni zavod ima Statut koji donosi Upravni odbor Federalnog zavoda, a istim se uređuje organizacija Federalnog zavoda, prava, obaveze i odgovornost organa upravljanja i rukovođenja djelokrug rada, ovlaštenja, uvjeti imenovanja direktora i zamjenika direktora Federalnog zavoda, kao i uvjeti i postupak postavljenja rukovodioca i zamjenika rukovodioca Središnje službe i rukovodioca administrativnih službi, te druga pitanja od značaja za rad Federalnog zavoda.

Članom 5. propisano je da su Organi Federalnog zavoda Upravni odbor, Nadzorni odbor i direktor, a da predsjedavajući Upravnog i Nadzornog odbora, direktor i zamjenik direktora ne mogu biti iz reda istog konstitutivnog naroda.

Članom 6. propisano je tripartitno upravljanje Federalnim zavodom, kao osnovna odrednica reforme penzijskog sistema. Naime, ovim članom propisano je da je Upravni odbor organ upravljanja i sastoji se od predsjedavajućeg i šest članova.

Njega na prijedlog Ministarstva, imenuje i razrješava Vlada. S tim da se dva člana imenuju na prijedlog Ministarstva iz reda zaposlenika Ministarstva, a po jedan član na prijedlog Federalnog ministarstva finansija iz reda zaposlenika, Federalnog zavoda iz reda zaposlenika zavoda, reprezentativnog većinskog udruženja penzionera u Federaciji Bosne i Hercegovine, reprezentativnog većinskog sindikata u Federaciji Bosne i Hercegovine i reprezentativnog većinskog udruženja poslodavaca u Federaciji Bosne i Hercegovine. Nadalje, ovim članom propisani su uvjeti za imenovanje, te dužina mandata.

Članom 7. propisano je koje poslove obavlja Upravni odbor.

Članom 8. propisan je način odlučivanja Upravnog odbora.

Članom 9. propisano je da je Nadzorni odbor Federalnog zavoda organ nadzora i sastoji se od predsjedavajućeg i dva člana, te da isti, na prijedlog Ministarstva, imenuje i razrješava Vlada, na način da po jednog člana predloži Ministarstvo iz reda zaposlenika Ministarstva, Federalno ministarstvo finansija iz reda zaposlenika i reprezentativna većinska udruga penzionera u Federaciji Bosne i Hercegovine. Nadalje, ovim članom propisani su uvjeti za imenovanje, te dužina mandata.

Članom 10. propisano je koje poslove obavlja Nadzorni odbor.

Članom 11. propisano je da je direktor Federalnog zavoda organ rukovođenja, a da ga imenuje Vlada, nakon provedenog javnog konkursa. Nadalje, ovim članom propisani su uvjeti za imenovanje, kao i dužina mandata direktora. Također, ovim članom propisano je da direktor ima zamjenika koji se imenuje i razrješava na isti način kao i direktor.

Članom 12. propisano je koje poslove obavlja direktor i zamjenik direktora.

Članom 13. propisano je koje uvjete treba da ispunjavaju lica koje se imenuju u Upravni odbor, Nadzorni odbor, kao i direktor i zamjenik direktora. Također istim članom propisano je da član Upravnog odbora, Nadzornog odbora, direktor i zamjenik direktora ne može biti lice koja je pravosnažno osuđivano za krivično djelo koje ga čini nedostojnim za obavljanje te funkcije, a naročito krivičnih dijela protiv privrede, poslovanja i sigurnosti pravnog prometa, odgovorno lice u privrednom društvu nad kojim je pokrenut stečajni postupak i lice koje ima poslovni odnos sa Federalnim zavodom, odnosno lice čije bi djelovanje moglo da dovede do sukoba interesa.

Članom 14. propisano je kada se razriješavaju član Upravnog odbora, Nadzornog odbora, direktor i zamjenik direktora.

Članom 15. propisano je da Federalni zavod ima jednu Središnju i više administrativnih službi. U Središnjoj službi vrši se obavljanje pravnih,

ekonomskih, administrativnih i drugih poslova Federalnog zavoda, a administrativne službe su unutrašnje organizacijske jedinice Federalnog zavoda, čiji broj, prema potrebama, utvrđuje Upravni odbor. Nadalje ovim članom propisano je da Središnjom i administrativnim službama rukovode rukovoditelji, koje imenuje Upravni odbor, a na usaglašeni prijedlog direktora i zamjenika direktora, u skladu sa važećim propisima iz oblasti radnog Zakonodavstva.

Članom 16. propisano je koji se poslovi obavljaju u Središnjoj službi.

Članom 17. propisano je koji se poslovi obavljaju u administrativnim službama.

Članom 18. propisano je da Statut i druge opće akte priprema Federalni zavod, kao i šta se uređuje Statutom. Također, ovim članom propisano je da saglasnost na Statut i na druga opća akta Federalnog zavoda daje Ministarstvo, a da se ista objavljuju u "Službenim novinama Federacije BiH".

Članom 19. propisano je da nadzor nad radom Federalnog zavoda vrši Ministarstvo i nadležna inspekcija, svako u okviru svoje nadležnosti, te da u vršenju inspekcijskog nadzora nadležni inspektor ili drugo ovlašteno lice, za utvrđene nepravilnosti poduzima mjere prema općim ovlaštenjima propisanim Zakonom kojim se uređuje odgovarajuća oblast inspekcija.

Članom 20. propisane su kaznene odredbe za Federalni zavod i odgovorno lice u Federalnom zavodu.

Članom 21. propisano je da će Federalni zavod svoje opće akte i organizaciju uskladiti sa odredbama ovog Zakona u roku od 90 dana od dana stupanja na snagu ovog Zakona, kao i da će se do donošenja novih općih akata, primjenjivati akti koji su bili na snazi na dan stupanja na snagu ovog Zakona, ako nisu u suprotnosti sa ovim Zakonom.

Članom 22. propisano je da mandat predsjedavajućem i članovima Upravnog odbora, predsjedavajućem i članovima Nadzornog odbora, direktoru i zamjeniku direktora Federalnog zavoda i direktorima i zamjenicima direktora Središnje i kantonalnih administrativnih službi, prestaje najdalje u roku od 120 dana od dana stupanja na snagu ovog Zakona, te da će se status direktora i zamjenika direktora Središnje administrativne službe, kao i direktora i zamjenika direktora kantonalnih administrativnih službi riješiti u skladu sa važećim Zakonskim propisima i općim aktima Federalnog zavoda, u roku iz stava 1. ovog člana.

Članom 23. propisano je da stupanjem na snagu ovog Zakona prestaje da važi Zakon o organizaciji penzijskog i invalidskog osiguranja ("Službene novine Federacije BiH", br. 49/00, 32/01 i 18/05).

Članom 24. propisano je da ovaj Zakon stupa na snagu osmog dana od dana objavljivanja u "Službenim novinama Federacije BiH".

V FINANSIJSKA SREDSTVA

Za provođenje ovog Zakona nisu potrebna dodatna sredstva iz Budžeta Federacije Bosne i Hercegovine.